



САМУРДИН

ССС

ГОЛОС САМУРА

«Магарамдхурь район» МР-дин
общественно-политический газет.
Общественно-политическая газета
МР «Магарамкентский район».

Газет 1951- йисалай акъатзава. № 25 (7953) киш, 22- июнь, 2019- йис. Къимет 6 манат



22- ИЮНЬ

РИКІЕЛ ХУЪНИН ВА ГЪАМ ЧІУГУНИН ЮГЪ Я

ВАТАНДИН ЧІЕХИ ДЯВЕ БАШЛАМИШАЙ ЙИКЪАЗ ТАЛУКЪ ЯЗ

УЪЛКВЕ КЪАРСУРАЙ ДЯВЕ



1941- ЙИСАН гатун сифте варз уълкведин тарихда мусибатдинди яз гъатна. 22- июндиз Гитлеран Германияди дяве малумар тавуна Советрин уълкведал гъужумна.

Делилри тестикъарзавайвал, чи армия душманрин хураз къегъалвилелди экъечіна. Агъзурралди аскерарни командирар чанарилай гъил къачуна, душман виликди атун акъвазариз алахъна.

Амма къуватар барабар тушир. Гъавиляй дяведин сифте йикъара гитлерчийрилай чи гзаф самолетар терг ийиз, уълкведин деринриз гъахъиз алакъна. Уълкведин Яракълу Къуватрихъ бес къадар танкар, самолетар, тупар, автоматарни авачир. Советрин Союз армия ва флот яракъламишиз анжах эгечінавай.

→ 2



РАЙОНДИ - ФРОНТДИЗ

МАГЪАРАМДХУЪРЯЙ фронтдиз 2500-далай гзаф итимар фена. Абурукай 1800 касдилай гзаф Ватандин Чіехи дяведин ягъунрин майданра игитар хъиз телеф хъана. Хуърера дяведин ялав галукъ тавур хизан саки амукънач. Зегъметдин фронтдани вири хуърерай гзаф инсанри иштиракна. Чи райондин агъалийри танкарин «Дагъустандин колхозчи» колонна туйкълурун патални пул къватлуна активвилелди иштиракна.

БАТАНДИН ЧІЕХИ ДЯВЕ БАШЛАМИШАЙ ЙИКЪАЗ ТАЛУКЪ ЯЗ

УЉКВЕ КЪАРСУРАЙ ДЯВЕ

1 ←

Бязи маса кимивилерни себеб яз чи къушунрикай гзаф телеф жезвай.

Германиядин генералрин фикир дяве 2-3 вацра куътягун тир. Идахъ бине авачиз тушир. СССР-дал вегьедалди Германияди Европадин вири уљквейр муътуьгъарнавай. А уљквейрин экономикади душмандиз кІвалахзавай, абурун яракъни душмандин гъиле гъатнавай.

Советрин халкъ Ватан хуъз къарагъна. Сифтегъан къизгъин женгерикай сад Брестдин къеледал кыле фена. Фронт къвердавай гегъенш жезвай, душман виликди къезвай. Анжах 1941- йисан зулуз Советрин къушунри Смоленск шегъердин патарив немсерин виликди атун акъвазарна, абур оборона къуниз мажбурна. Душман меркездал ахъай тавун патал ина Советрин аскерри игитвилелди женг чІугуна. Гъа и ягъунра лап викІегъвилелди иштирак авур къуд дивизияди уљкведин къушунрин тарихда сифте яз гвардейский лугъудай тІвар къачуна.

Телефвилеризни килиг тийиз гитлерчияр уљкведин деринриз гъахъиз алахънавай. Литва, Латвия, Беларуссия, Эстония, Молдавия, Украинадин гзаф областарни душмандин гъиле гъатнавай. Ленинграддиз мукъва жезвай, Киевдив, Одессадив,

ва уљкве патал еке важиблудвал авай шегъерив ва районрив агатзавай.



Шегъеррай, хуърерай гъиле яракъ къаз жедай вири фронтдиз фенай. Дяведиз фейи бубайрин, стхайрин, багърийрин чкаяр эвез авур дидейринни яшлугурун, зегъметдиз къабил тахъанвайбурун хиве хуъруьнбурун фалди, мал-къара алафралди таъминарунин, фронтдиз куъмекар гунин... везифаяр гъатна. Жемятди вири четинвилериз таб гана, югъ-йиф талгъана производстводин вири хилера гъакъисагъвилелди кІвалахна. Туьрездалди цанар цаз, тумар гъилералди кутаз агъзурралди гектарра бегъерар битмишарна. Магъсулар мукалралди гуъз, цуълер арабайра аваз хкиз, ратІарал яцар, балкІанар квай ругунар ишлемишиз гъар йисуз фронтдиз агъзур тонндив

→ 3

**ВАТАНДИН ЧІЕХИ ДЯВЕ БАШЛАМИШАЙ
ЙИКЪАЗ ТАЛУКЪ ЯЗ**

УЪЛКВЕ КЪАРСУРАЙ ДЯВЕ



2 ←

агакъна техил гана. Къакъ-ан бегъеррин сир, лежберар магъсулрихъ къайгъударвилелди гелкъуьн тир. ИкІ дяведин йисара гъар са гектардай 20 центнердилай тІмил тушиз техил кІватІ хъувур вахтар гзаф хъана. Техника авачиз, бегъем куьмекар галачиз четин шартІара гъасилзавай ризкъидикай государстводин планарни ацІурайла, колхозчийрин зегъметдин йикъарайни гайила, игъти-яж авай майишатрив техил буржуна вугудай, базаррани гудайди амукъдай. Делил-рай дяведин дар йисара дагъдин хуьрерин лежберри чІугур зегъмет аквазва.

Ленинградди 900 йикъан оборона игитвилел гъалтайла тарихда вичиз тешпигъ авачир хътинди хъана. Зулуз душман Москвадив агатна. Немсер меркездиз гъахъ-дайдахъ, дяве куьтягъдайдахъ инанмиш тир. Москва хуьн патал уьлкведин вири пипІерай алава къушунар атана. Абуруз тІвар-ван авай машгур полководец Г.К. Жукова руководство гана.


1941- йисан декабрдиз Москвадин патаривай чи къушунри еке гъужум башламишна. Гуьгъуьн-лай Сталинград патал башламишай ягъунар ругуд вацра давам хъана. И ягъунра 330 агъзурдалай гзаф немсер есирда къуна. Сталинграддин ягъунри вири дяведин гъал дегисарна. Чи къушунри душман хайи чилелай тамамвилелди чукуриз башламишна.

Чіехи Гъалибвал къазанмишай 1945- йисан сифте къилерай чи къушунар Германиядиз гъахъна. Чи къушунрин къаршидиз США-дин, Англиядин, Франциядин къушунарни атана. 8- майдиз Гитлеран Германиядин къушунри рахун авачиз рей гунин гъакъиндай Актунал къул чІугуна. ИкІ 1418 юкъуз-ни йифиз давам хъайи дяведи уьлкве къарсурна, ада душмандиз чи халкъдин игитвал къалурна.

Р. МУРАДАЛИЕВ.

МАЛУМАТ

**ШЕЙХЕРИН ШЕЙХ,
ИМАМРИН МУРШИД
Я ВУН**



АЛАЙ ЙИСАН 29- июндиз Магъамамдхуьруьн культурадин КІвалин чіехи залда Дагъустандин ва Чечнедин пуд имамдин муршид, вичин чіехи Ватан- Дагъустан, гъамни вирида гъурметзавай гъвечлі халкъ- лезгияр чіехи авур шейх МАГЪАМЕД ла-Ярагъидин экуь къамат рикел хкуниз талукъарна Республикадин масштабда аваз гегъенш форум киле фида.

ТІалабзава вири районэгълийривай киле физвай мергъяматлу межлисда иштирак авун.

**ТЕШКИЛЛУВИЛИН
ОРГКОМИТЕТ.**

ЯШАЙИШ

КЪУЛАЙ ШАРТИАРА

ШКОЛАЙРА каникулар башламиш хъанва.

Гъелбетда, каникулрин вахтунда аялри чпин вахт менфятлудаказ кечирмишунихъ, ял ягъунихъ, чпин сагъламвал мягкемар хъувунихъ еке метлеб ава. Гъайиф гъи, чи Дагъустанда аялриз гатун вахтунда ял ядай лагерар гзаф авач. Шадвал кутадай кар ам я хъи, чи Магъарамдхуьруьн районда аялриз ял ядай «Приморский» лагерь кардик кваз гзаф йисар я. Ана гъар йисуз Дагъустандин шегъеррай ва районрай цудралди аялри ял язава, сагъламвал мягкемарзава. Лагерь тебиатдин лап гуьзел чкадал ала. Ам гуьлуьн патав, тамун юквал ала. Ина школьникар яшамиш жедай, ял ядай къулай шартлар яратмишнава, ксудай къве мертебадин дарамат, спортдин майданар, столовая, медпункт кардик ква. Аялриз йикъа 4 сеферда тлуьнар гузва. Гъар юкъуз якун хуьрекар гъазурзава, яр-емиш ва ширинлухар гузва, машгулатрин жуьреба-жуьре мярекатар тешкилнава. Гъар йисуз «Приморский» лагердиз Махачкъаладай, Магъарамдхуьруьн, Сулейман-Стальский, Къурагъ, Рутул районрай аялар къвезва. Яшариз килигна, абур группариз пайнава. Гъар са группада дежурство тухузвай тербиячярни ава. Аялриз дарих жедай вахт лагерда жезвач, къилдин ва дестедин программаяр тайинарнава. Ана жуьреба-жуьре нянин шадвилини межлисар, манияр лугъузва, къуьлер ийизва, лагерда авай аялар гъамиша гуьзчивилик ква. Аялриз яшайишдин къулайвилер яратмишун патал вири къуватар эцигзава. Абур гъич са куьнихъни муьгтеж туш. -Аялри ял язавай гъал бегелмиш хъанани квез?,- лагъана хабар къуна за вичин гада лагердиз гъанвай са дидедай.

-Лагерда квалар тешкилнавай гъалдилай, ана авай хъсан къайдадилай чун диде -бубаяр гзаф рази я. Гъавилай за зи аял гъар йисуз «Приморский» лагердиз гъизва.

Идалай алава яз, Приморскда авай гуьлелай гъейри,



инихъ мад са къетленвал ава. Инин тебиат, адан гуьзелвал, иллаки ина авай лианадин там. Тебиатдин гуьзелвиликай лезет кхудиз, яни ял ягъиз иниз гъар йисуз Россиядин вири пилерай туристар къвезва. Абур патал ина ял ядай, ксудай квалер, фу-яд патал кафеяр, столоваяр тешкилнава. Туристриз къуллугъ авун патал, вили-

райондин Администрацияди туристар иниз желб авун, къилин везифайрикай сад яз гъисабзава. Идахъ вичин себбарни авачиз туш. Райондиз ял ягъиз къвезвай туристар ичли жибинар гваз къвезвач, абур ина жуьреба-жуьре харжияр ийизва. Эгер ачухдиз рахайтла, чи районгълийри салара гъасилзавай яр-емиш



камаз транспортдин къайгъуни авунва. Ихътин тешкилла квалархи ял язавайбуруз неинки са Приморскдин, гъакл чи райондин ва вири Дагъустандин тарихдин, культурадин чкайриз тамашиз фидай мумкинвал гузва.

И къулайвилер тешкилнавай

маса къачузва, туьквенриз, базарриз физва, анра пулар харжзава. Са гафуналди, им чи райондиз къазанжияр гъидай мад са хел я. Алай йисуз туристрин къадар мадни артух хъун гуьзлемешзава.

ЖАННА.

ХАБАРРИН КИМ

ЦИЙИ КАМАР



МГУ- дин глобальный процессрин факультетдин теклифдалди тешкилзавай РОГИС- да (Российское общество глобальных исследований) Дагъустандай са шумуд алим гъатнава.

Обществоди 50 региондин чирвилерин ва илимдин векилар санал кватлзава. Адан кылин везифа глобальный со-

циальный ва социоприродный процессрин гъакъиндай чирвилер артухарун ва вилик тухун я.

Алатай гъад юкюз Москвада и обществодин собрание кыле фена. Собраниеда алимар, ДГУ-дин малимар тир политический илимрин кандидат Саида Сиражудиновади ва физико-математический илимрин кандидат Саид Ниналалова, РОГИС-дин Дагъустандин отделениедин правлениедин членри иштиракна. Дагъустандин алимри международный терроризмди ва экстремизмди арадал гъизвай глобальный хаталувал чирунихъ элкьурнавай кваллах тухузва.



АГЪАЛИЙРИН ИХТИЯРАР ЧІУРНАВА

АЛАЙ йисан сад лагъай паюна Росздравнадзордин пешекарри ругуд сеферда ахтармишунар тухвана. Тухвай кваллахдин нетижада, субъектри чпиз ганвай ихтиярар законодательстводи истемишунрал амал тавуна ишлемишуналди агъалийрин ихтиярар чіурай дуйшуьшар малум хъанва.

РФ- дин кіуьд субъектда, гъабуркай яз Дагъустанда, кьезилвилер авай рецептра кьалурнавай важиблу дарманралди агъалияр вахтунда таъминарнавач. Дарманар геж гунилай гъейри, кьезилвилер авай дарманар кьалурзавай рецептралди таъминарунин месэладиз элкьвенва. Ихътин кимивилер са жерге муькуь регионрани ава.

Ахтармишунрин нетижа ярни галаз вири информация компетентный органриз рекье тунва, хабар гана Росздравнадзордин пешекарри.

ШАД ХАБАР

И ЙИКЪАРА чав мад са шад хабар агакьна. Алай йисан 10- июндалай 14-июндалди Анапа шегьерда Грэплингдай ва ММА-дай дуйньядин кубокдин турнир кыле фена. Грэплингдай чи районэгъли Шамил Абдулаев заланвилин категориядай (55кг) гъалибчи яз экъечина І-чкадиз лайихлу хъана ва адан тренер Садир Айвазова бразильский Джиу – Джитсу вили чіул къачуна.

Им чи кьегъал хва Садиран нубатдин агалкьун я. Япарал заланбурун арада самбодай



кыле фейи Россиядин чемпионатда Садир Айвазован тербиячи Назим Саидова вичин заланвилин категорияда (57кг) Россиядин Чемпионвилин твар къазанмишна.

Чна тренердиз ва жегил спортсменриз хъанвай агалкьун мубаракзава, куй квехъ чандин мягкем сагъвал ва хъянавай спортдин рекье гъар сеферда пьедесталдин вини кларариз хкаж жедай гъевес ва кьуватар хьурай.

Чиниз хабарар кватлйади
А. АЙДЕМИРОВА я.

Мукъаят хъана кланда

ГАТУН варцар алуьнава. Школайрай ахъайнавай аялар патал и вахт халис сувариз элкъезва. Патара авай чи районэгийяр, дагъустанвияр гатун вахтунда яргъарай иниз хквезва гъуьлрал эхъуьнар ийида, ял яда лугъуз. Амма гъина ял язаватлани, сифте нубатда а чкадин экологиядиз, санитарный гьалариз фикир гана кланда. Эгера «Экъуьн къадагъа я», хъенвай малуматар алатла, абурун истемешунрал амал авунин чарасуз-



вал ава. Алатай йисуз Дагъустанда эхъуьнардай сезон башламиш хъайидалай къулухъ 12 кас батмиш хъана. Ихътин мусибатдин статистикадин шагъидар хъанвай Республикадин МЧС- дин Управлениеди чи халкъдиз ва къвезвай мугъманриз мукъаят хъуниз эвер гузва. Амма садазни и малуматрихъ яб гуз кланзавач. Чпин сагъламвал, уьмуьр чпин гъиле авайди рикелай ракъурзава. Гзаф дуьшуьшра элкъвена хкведай къуватар бес тахъуни, кьвачерикай чил хкитайла теспача хъуни, зарб лепейри рикелай тефидай дуьшуьшрихъ гъизва. Яд элкъвезвай чкайрив агатайла гьасятда

цин кланиз члугвазва. Дуьзгуьн сирнав ийизвай касдивайни гъамиша цихъ галаз женг тухуз алакъзавач. Ял тунвай резинадин чархарал, месерал алаз сирнавзава, ахпа абур къезил шейэр тирвиляй гару яна яргъариз тухузва ва гзаф вахтар абур элкъвезва. Ихътин дуьшуьшра къерехда авайбур агакъдалди абур батмиш жезва. Чехибур гъуьлуьз гъахъна, гъвечли аялар, вахар, стхаяр цин хъерехда текдиз тур ва абур хатадай алуькна цин къе-

низ яд фейи дуьшуьшарни малум я. Пияндиз циз гъахъзава, атай лепеди яна кьвачер хкудна ачух гъуьлуьхъди тухвай дуьшуьшарни хъанва .

Гъуьрметлу диде-бубаяр, куь саймазвилини, мукъаятсузвилини нетижада рикелай тефидай бедбахтвилер гъизва. Иниз килигна сифте нубатда санитарный гьалариз фикир гун, жувахъ галай чехи гъвечидал мухъаят хъун чарасуз я. Бубайрин мисалда лугъузвайвал цихъни, цлухъ галаз гъуьжет жедач. Ша чна гьалалвилелди ял ягъуникай лезет хкудин.

ЖАННА.

Чир хъун хъсан я

*Мегъуьн тарцин, ваклан клирийрин (облепиха), японский сафорадин чкалри бедендик квай шежердин къадар къайдадик кутада. Цикорийдин ва репейникдин (къакъар) дувулри чларар, сарар, кикер мягъкемарда, вилерин экв хъсанарда. Абурук табакъдин шейэр А, Е, С, В, В-2, В-6, В-9 витаминар. Омега -3, Омега-6, Омега -9 кислотаяр ва кремний гзаф ква.

*Ваклан клирийрин (облепиха) чкалри иммунитет хкажда, риклин квалах хъсанарда, бедендик иви тимил хъанвайла, ам къайдадиз хкиз, иринламиш хъанвай (язва) хирер, остеопороз азарар сагъариз куьмек гуда.

* Хъархъу тарцин таза хилерин чкалрихъ беденда авай йоддин къадар ва нефесдин органар къайдадик кутадай, гъакни беденда авай жуьреба-жуьре паразитар (шарар ва мсб.) рекъидай ва щитовидный железадин азарар сагъардай къуват ава.

*Чуру шабалатрин таран чкалри рик1ин азарар, тромбофлебитар, фалуждин, варикоздин азарар сагъариз ва бедендик квай холестерин тимилариз куьмек гуда.

*Цвевелин тарцин чкалар куьлуь тварар акъатна, даклуна яру хъанвай (восполительные) азарар (маститы, циститы, кисты) сагъар хъийидай къуватлу антибиотик я.

*Гъуьлцин тарцин, аморфдин, лимондин, чуру пинидин чкалар нервияр секинардай ва хъсан ахвар гъидай дарман я. Лимондин, чуру пинидин, чумалрин, мерейрин, малинадин тарарин чкалар ругур гъалимади иви хъсандиз къери ийида.

*Ичин тарарин таза хилерин чкалри, жикийрин ва инийрин тарарин дувулри, гъакни пырейдин ва свинойдин дувулри дурклунар, туькьуьл ва цварадин куркур къумадикай ва куьлуь къванерикай михъи хъийида.

ХИЗАНДИН БАХТ...

ЭХИРИМЖИ вахтара, чи халкъ девлетлу хъанва лагъайтІа са кІусни ягъалмиш жедач. Эцигзавай къакъан, мягъкем кІвалери, гъаятдал алай улакъри, алукизавай багъа парталри, незвай продуктри, икъван чІавалди такур жуъре яр-емишри ва са жерге маса крари идан гъакъиндай шагъидвалзава. Регъятвилерикай, къулайвилерикай мад рахамир. ТІуб илисайла кІвал михъзава, пекер чуъхуъзва, як регъезва, векъ язава ва икІ мад. Гъамамар, регъятханаяр кІвалин къенера хъанва, кими са шейни авач.

Виридахъ вири ава, амма къенин юкъуз вил галаз мягъкем ,бахтлу хизанар цІаруз-къериз гъалтзава. Аламат жедай кар ам я хъи, гъафтедин ирид юкъузни мехъерин теклифдин чарар къезва. Са юкъуз пуд мехъерик феи вахтарни жезва. Фландан руш а фландан гададиз це лагъана ван чІидалди мехъерик теклифзава. Гъелбетда инсанар кІеве гъатайтІани мехъерин тІвар къурла чаз хвеши жезва. Амма гъайиф хъи и хвешивилер яргъалди давам жезвач. Мехъерин буржар алатдалди жегъилар чара хъижезва. Себебарни гъар жуъре.

Икъван чІавалди секиндалказ намусдалди фу незвай, хуъре аватІа

чир тахъай хизанда свас атайла вучиз ятІани къал гъатзава. И дяве физвай вахтунда аяларни жезва. Чара хъайилани дяве куътягъ жезвач, ам мадни къызгъин жезва. Гила са тахсирни квачир малаик хътин аялар кІулавай залан парциз элкъезва. Папа вичелди итимди вичелди ялиз арада авай аялри вуч гъиссзаватІа, садани хабар къазвач. Уъмуърдин виридалай хъсан жегъил бере файдасуз дяведиз пучзава.

Виликдай цІуд-цІувад къил хизан са кІвале авай, дарвилерни гъаф ацалтзавай, вири сад хъана зегъмет чІугъазвай, чІехи -гъвечІи чизвай еке хизанда гъуърметдивди яшамин жезвай. Яшайишдин рекъайни артух къулайвилерни авачир. Къулара цІаяр хъийизвай, яд са къадар мензилдай кІулаваз гъизвай, патаз фидайла улакъдикай, недай суърсетдикай, парталдикай къитвал авай. ЧІехи инсанди туъгъмет авурла къил хкажна адан чиниз килигиз жедачир. Гила лагъайтІа чІехибуруз гъвечІибурукай кичІезва. Аял шехъайла гъиле са ширинлух, фуан кІус ва я суска вугудай. Гила абур вири мобилъный телефонри эвезнава. Зун къацел ацукъайла мягъледа цІудалай виниз аялар цлан кІаневай куъсридал ацукъна вири телефонрал къугъвазва. Ибур чун хъиз са кат-катлугъзавач, сад-


садахъ галаз рахазвач налугъуди ибур кимибур я, чеб-чпихъ хъуърез телефондиз тІуб гузва. Гъайиф хъи ихътин шикилар чІехибур ацукънавай суфрадихъни аквазва. Сада тІуърин муъкуъда авай чкадин шикилар ягъиз соцсетрин гъарустадин майдандал акъудзава.

Эхиримжи вахтара пайда хъанвай и соцсетар сеbeb яз, яргъал йисара яшамин хъанвай, агакънавай аялар авай хизанарни чкІизва. Чеб куъчейра тІимил аквазвай хъиз телефонрани хутазва...Къейи-хайи вири гъана жезва. Авур тІуърин, алукиай партални, атай мугъманни раиж авун адетдиз элкъевенва. Нагъакъан гъерекатрал машгъул хъана хизан, кІвал, дердияр гъилелай вегъезва. Мягъкем хизан тешкилун, ам хуърин, балаяр чІехи авуна эвленмишун - ибур чаз чІехи бубайрилай атанвай хъсан адетар я. Гъайиф хъи алай вахтунин жегъилри, абурухъ галаз са яш хъанвайбуруни и адетрал амалзавач.

Эхиримжи йисара югъ-йикъандавай артух жезвай чара хъунри обществодин мягъкемвал зурзурзавайдакай, жавабдарвал квадарзавайдакай, инсандин къадирлувал агъуз аватзавайдакай, хизандин бахт лугъудай ихтилат михъиз чи арадай акъатзавайдакай садани фикирзавач...

А. АЙДЕМИРОВА .

КРОССВОРД



ДУЪЗ ЦИАРАРА: 1.Сесер гу-нин кампания. 4.Муьфте, гъакъ-исуз. 7.Магъсулдин са жуьре. 8.Дагъда. 9.Гъуьжетун, акъажун. 10.Гъуьрметлу, багъа. 12.Буржу-на шей къачун. 13.Магъле. 14.Зиян гудайди. 16.Ядигар. 19.Хунча, нехиш авачир рак. 21.Гъафтедин са югъ. 22. Къимет авай заті. 23.Мублагъвилелди, бул яз. 24.Тамун гъайван.

ТИК ЦИАРАРА: 1.Прокурату-радин къуллугъчи. 2.Хат. 3.Къи-лиз, чурудиз ядай лацу жанг. 4.Меккеда гъаж авуна хтай кас. 5.Гъисабунар гъализ чирдай илим, ктаб. 6.Такъатсуз. 11.Дах-дин стха. 12.Багъа. 14.Месэла. 15.Ихтибарсуз, итимсуз. 17.Чу-банрин машгъур киці. 18.Чан-рикI, туьмер авун. 19.Къекъверег. 20.Ам ціаюн винел жеда.

Кроссворд туькљуьрайди
Абдулзагъир АТАХАНОВ я.

АЯЛАР ПАТАЛ

ИМ МАСА ЖАНАВУР Я

Къуд лагъай классда дидед чIалан тарс тухузвай малимди аялриз подлежащие ва сказуемое галай простой предложение туькљуьрунин тапшуругъ гана.

Класс киснава. Аялар ван акъуд тавуна предложение туькљуьриз алахънава. Амма алакъзавай хътинди туш. Гъа и арада Расула гъил жкажна. Ви-чикни, масад вилик акатиз кичIела, гзаф тади ква.

Расулан гъил акур малимди адаз вичин предложение лугъун теклифзава.

-Жанаевурди хиперал вегъена,- са нефесдал лагъана гадади.

-Аферин Расул, ваз вад. Фикир ая, аялар. Мад ни туькљуьрна пред-ложение.

Класс киснава. Садаини ван-сес акъатзавач. Вирибуруз вадар къачуз кIанзава, амма рикIел затIни къевезвай хътинди туш.

Аквазва малимдиз, мад Расулан гъил цава ава.

-Къе Расул активни яз аквазва. Къарагъна лагъ кван ви предложе-ние, - теклифзава малимди.

-Жанаевурди хиперал вегъена,-

мад са нефесдал ван алаз лугъ-узва гадади.

-Расул, жанаевур галай пред-ложение хъанай къван.

-Малим, им маса жанаевур я,- са кIусни вичивай-вич квахъ та-вуна жаваб гана гадади.

Фикрет ГЪАЖИЕВ.

Азадогълийрин СОШ-дин 9-класс куьтягъайдан гъакъиндай 2012- йисуз Гъасанов Шамилгаз гайи 05 БВ 0053462- нумрадин аттестат квахъуниз килигна **къуватда амачирди яз гъиса-бин.**

<p>Къилин редактор А.А. ИСМАИЛОВ.</p>	<p>Учредитель: Администрация муниципального района «Магарамкентский район».</p> <p>Адрес: 368780. РД, Магарамдхуьруьн район, Магарамдхуьр, Гагаринан куьче, 2.</p>	
<p>Редакциядин адрес: 368780. РД, Магарамд-хуьруьн район, Магъа-рамдхуьр, Ленинан куьче.</p>	<p>Газета «Самурдин сес» (Голос Самура) зарегистрирована Региональным управлением Комитета РФ по печати в РД.</p>	<p>Газетдин регистрациядин нумра- Д 0174</p>
<p>Газет гъафтеда садра акъатзава.</p>	<p>Чап ийиз вахкудай вахт - 16.00. Чапун патал къул чIугуна- 15.00.</p>	<p>Газет ООО «Самур» типографияда гъазурна ва гъана чапна. Типографиядин ва издателдин адрес: 368780. РД, Магарамдхуьруьн район, Магарамдхуьр, Ленинан куьче. Лезги чIап.</p>
<p>Телефонар: редактор- 25-1-37, жавабдар секретарь - 25-1-39, бухгалтер-25-9-69.</p>		<p>Индекс 63340. Тираж 1400 Заказ № 25</p>

6+